

## Fatgs d'asil: Proceduras acceleradas na bastan betg sulettas

■ (cc) La regenza beneventa la restructuraziun dal sector d'asil che ha l'intenziun d'accelerar las proceduras d'asil en general. Ella sustegna en quest regard il sboz davart la midada da la lescha d'asil ch'è vegnì preschentà da la confederaziun. Davart singulas disposiziuns s'exprima la regenza en la consultaziun dentant cun resalvas. A ses avis è la ristga fitg gronda ch'il dretg proponì da survegnir ina cussegliaziun giuridica respectivamain ina represchentanza legala gratuita n'augmentass betg mo l'attractividad nungivischada da la Svizra sco destinaziun per requirentas e requirents d'asil, mabain chaschunass er in'ulteriura normaziun da las proceduras d'asil. Perquai propona la regenza da stritgar il dretg da survegnir ina represchentanza legala gratuita.

Da princip ston vegnir realisadas acceleraziuns da las proceduras er en il sector da l'execuziun da speditas. Uschia ston vegnir fixads – sin il stgallim da la lescha – clers motifs d'arrest, ils quals permettian als chantuns, che vegnan incumbensads d'exequir speditas, d'ordinar mesiras repressivas dal dretg da persunas estras suenter la publicaziun da la decisiun da spedita da l'emprima istanza. Proceduras pli sveltas na garanteschian anc betg che las speditas vegnian exequidas meglier. Anzi vegn la part da las requirentas e dals requirents d'asil ch'è vegnida refusada cun vigur legala e che n'ha nagina perspectiva da dimora en Svizra a s'augmentar fermamain. Uschia crescha la ristga ch'ils custs per l'agid d'urgenza s'augmentan considerablamain. Pertutgads da quai vegnan ad esser cunzunt ils chantuns che n'han nagins centers federals sin lur territori. Perquai duai la confederaziun pajar als chantuns er en l'avegnir ina pauschala d'agid d'urgenza che cuvra ils custs.